

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԵՎ ՏՆՏԵՍԱԿԱՆ
ՄՐՑԱԿՑՈՒԹՅՈՒՆԸ ԿԱՐԳԱՎՈՐՈՂ ՊԵՏԱԿԱՆ ՀԱՆՁՆԱԺՈՂՈՎ**

Ծ Ր Ա Գ Ի Ր

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԵՎ
ՏՆՏԵՍԱԿԱՆ ՄՐՑԱԿՑՈՒԹՅՈՒՆԸ ԿԱՐԳԱՎՈՐՈՂ ՊԵՏԱԿԱՆ ՀԱՆՁՆԱԺՈՂՈՎԻ
2018 ԹՎԱԿԱՆԻ ՏԱՐԵԿԱՆ ԳՈՐԾՈՒՆԵՈՒԹՅԱՆ**

ՍՏԵՓԱՆԱԿԵՐՏ 2017

Բ Ո Վ Ա Ն Դ Ա Կ ՈՒ Թ Յ ՈՒ Ն

| | |
|---|----|
| Նախաբան | 3 |
| I. Հանրային ծառայությունների կարգավորման բնագավառ..... | 4 |
| II. Տնտեսական մրցակցության պաշտպանության բնագավառ..... | 8 |
| III. Հանձնաժողովի գործունեության հրապարակայնության, թափանցիկության ապահովումը և համագործակցությունը..... | 9 |
| IV. Հանձնաժողովի բյուջետային մուտքերի ապահովումը և պահպանման ծախսերի նախահաշիվը..... | 10 |

ՆԱԽԱԲԱՆ

Լեռնային Ղարաբաղի Հանրապետության հանրային ծառայությունները և տնտեսական մրցակցությունը կարգավորող պետական հանձնաժողովի 2018 թվականի տարեկան գործունեության ծրագիրը մշակվել է Հանձնաժողովի ստորաբաժանումների կողմից ներկայացված պլանային աշխատանքների հիման վրա:

Լեռնային Ղարաբաղի Հանրապետության հանրային ծառայությունները և տնտեսական մրցակցությունը կարգավորող պետական հանձնաժողովը (այսուհետ՝ Հանձնաժողով) կարգավորում է իրականացնում էներգետիկայի (էլեկտրաէներգետիկա, ջերմամատակարարում, գազամատակարարում), հեռահաղորդակցության (էլեկտրոնային հաղորդակցության), հեռուստատեսության և ռադիոյի, տնտեսական մրցակցության պաշտպանության, փոստային կապի (ունիվերսալ ծառայությունների սակագների սահմանման մասով), տրանսպորտային միջոցների պարտադիր տեխնիկական զննության անցկացման (սակագների մասով) բնագավառներում և ջրային ոլորտում (խմելու, ոռոգման, արդյունաբերական ջրի մատակարարում, ջրահեռացում և կեղտաջրերի մաքրում) օրենքով իրեն վերապահված իրավասությունների շրջանակում:

Ծրագրում ներկայացված են կարգավորման ենթակա ոլորտները և Հանձնաժողովի կողմից 2018 թվականին իրականացվելիք աշխատանքները՝ համապատասխան Հանձնաժողովի գործունեության բնագավառների.

- Հանրային ծառայությունների կարգավորման բնագավառ
 - Էներգետիկա, ջրային համակարգ,
 - Հեռուստատեսություն, ռադիո, հեռահաղորդակցություն (էլեկտրոնային հաղորդակցության) ու փոստային կապ,
- Տնտեսական մրցակցության պաշտպանության բնագավառ
- Հանձնաժողովի գործունեության հրապարակայնության, թափանցիկության ապահովումը և համագործակցությունը
- Հանձնաժողովի բյուջետային մուտքերի ապահովումը և պահպանման ծախսերի նախահաշիվը:

Ներկայումս Հանձնաժողովի կողմից տարվում է հստակ քաղաքականություն Լեռնային Ղարաբաղի Հանրապետությունում սպառողների և կարգավորվող անձանց իրավունքների պաշտպանության, նրանց շահերի հավասարակշռման, կարգավորվող ենթակառուցվածքներում արդյունավետ ներդրումների խրախուսման, ազատ տնտեսական մրցակցության պաշտպանության, ձեռնարկատիրության զարգացման, էլեկտրոնային հաղորդակցության ծառայությունների հասանելիության աշխարհագրության մեծացման և մատչելիության ապահովման, ռեսուրսների արդյունավետ օգտագործման, գործարար միջավայրի բարելավման ուղղությամբ:

Հանձնաժողովը իր բնականոն աշխատանքը շարունակելու է նաև 2018 թվականին՝ ապահովելով ընդունվող որոշումների կոլեգիալությունը, իրավաբանական համապատասխանությունը գործող օրենսդրությանը, կարգավորման թափանցիկությունը և հրապարակայնությունը:

Հանձնաժողովի գործունեությունը կազմակերպվելու է նիստերի և աշխատանքային քննարկումների միջոցով, իրականացվելու են ուսումնասիրություններ և ստուգումներ: Իր իրավասությունների շրջանակում մասնակցելու է տնտեսական և ֆինանսական ծրագրերի մշակման աշխատանքներին:

Հանձնաժողովը սույն ծրագրով ներկայացնում է կարգավորող ոլորտների առկա իրավիճակը և առաջիկա տարում կատարվելիք աշխատանքների ամբողջությունը:

Հանձնաժողովը 2018 թվականի ընթացքում գործելու է սույն ծրագրի և ծրագրից բխող ենթածրագրերի շրջանակներում:

I. Հանրային ծառայությունների կարգավորման բնագավառ

Հանրային ծառայությունների կարգավորման առանցքային ուղղությունները շարունակում են մնալ.

-**էներգետիկայի բնագավառը և ջրային համակարգը,**

- **հեռահաղորդակցության (էլեկտրոնային հաղորդակցության), հեռուստատեսության և ռադիոյի ու փոստային կապի բնագավառները:**

Ներկայումս ԼՂՀ-ում գործում է մեկ՝ 30 000 կՎտ-ից բարձր տեղակայված հզորությամբ (Սարսանգ ՀԷԿ, 50 ՄՎտ դրվածքային հզորությամբ) և 16՝ մինչև 30 000 կՎտ տեղակայված հզորությամբ հիդրոէլեկտրակայան (փոքր ՀԷԿ-եր)՝ որոնց դրվածքային հզորությունը գործարար ծրագրի համաձայն կազմում է 60,526 ՄՎտ: Էլեկտրաէներգիայի միջին տարեկան արտադրանքը միասին կազմում է 436,90 մլն. կՎտ/ժ: Կառուցման փուլում է գտնվում 8 փոքր հիդրոէլեկտրակայան՝ 39,41 ՄՎտ դրվածքային հզորությամբ և 244,165 մլն կՎտ/ժ էլեկտրաէներգիայի միջին տարեկան արտադրանքով:

2018 թվականին ԼՂՀ-ում կառուցման փուլում են գտնվելու 7 փոքր հիդրոէլեկտրակայաններ, որոնց գումարային դրվածքային հզորությունը կկազմի 22.277 ՄՎտ, ակնկալվում է, որ գործարկումից հետո դրանք միջին տարեկան հաշվով կարտադրեն ավելի քան 152.48 մլն կՎտ/ժ էլեկտրաէներգիա, իսկ փոքր ՀԷԿ-ում էլեկտրական էներգիայի արտադրության լիցենզիա կտրամադրվի 3 ընկերության, որոնց դրվածքային հզորությունը կազմում է 16.635 ՄՎտ, էլեկտրական էներգիայի միջին տարեկան արտադրանքը՝ 88.7 մլն կՎտ/ժ:

Հանձնաժողովը՝ ելնելով սպառողների և կարգավորվող անձանց իրավունքների պաշտպանության, նրանց շահերի հավասարակշռման, մրցակցային միջավայրի զարգացման համար պայմանների ստեղծման, կարգավորվող ենթակառուցվածքներում արդյունավետ ներդրումների խրախուսման և կարգավորման դաշտի թափանցիկության ապահովման առաջնահերթություններից, 2018թ. շարունակելու է **էներգետիկայի բնագավառի և ջրային համակարգերի** կարգավորման իրավական դաշտի բարեփոխումները՝ իրավական ակտերի լրամշակման և կատարելագործման նպատակով:

Մասնավորապես.

- «Էներգետիկայի մասին» ԼՂՀ օրենքում կատարված փոփոխություններին համապատասխանեցնելու նպատակով, կմշակվեն ընկերություններին տրամադրված

գործունեության լիցենզիաների պայմանների վերահսկողության, ինչպես նաև էներգետիկայի բնագավառում սակագների սահմանման ու վերանայման կարգերը: Նախատեսվում է առաջարկություն ներկայացնել «Գնումների մասին» ԼՂՀ օրենքում և ԼՂՀ ջրային օրենսգրքում օրենսդրական փոփոխություններ կատարելու համար:

- Կմշակվեն էլեկտրաէներգետիկական համակարգում վթարային կամ անհաղթահարելի ուժի հետևանքով առաջացած իրավիճակներում էլեկտրական էներգիայի ներկրման և արտահանման կարգը, այդ իրավիճակներում արտահանման նպատակով էլեկտրական էներգիայի առուվաճառքի (բաշխող-հաղորդող) պայմանագրի և ներկրման նպատակով էլեկտրական էներգիայի առուվաճառքի (հաղորդող-բաշխող) պայմանագրի և բնական գազի մատակարարման (մատակարար-բաժանորդ (բնակիչ)) պայմանագրի նոր օրինակելի ձևեր՝ ամրագրելով հիմնական և կարևոր իրավունքներն ու պարտականություններն, որոնք էական դեր են խաղում մատակարար-սպառող հարաբերություններում:

- Փոփոխություններ և լրացումներ կկատարվեն սակագների հաշվարկման մեթոդիկաներում՝ մեծ ուշադրություն կդարձվի նյութական ծախսերին և կատարվող ներդրումներին:

Հեռահաղորդակցության (էլեկտրոնային հաղորդակցության), հեռուստատեսության և ռադիոյի ու փոստային կապի բնագավառներում 2017 թվականի դրությամբ գործում են՝ ռադիոհաձախականությունների օգտագործման 13 թույլտվություն, հեռուստատեսության և ռադիոյի՝ 15 թույլտվություն և էլեկտրոնային հաղորդակցության՝ 3 լիցենզիա:

2018 թվականի ընթացքում շարունակվելու են.

- Բնագավառին վերաբերող ընթացակարգերին համապատասխան՝ ուսումնասիրվել ռադիոհաձախականությունների օգտագործման թույլտվությունների ստացման համար ներկայացվող հայտերը,

- մշակվելու և համապատասխան մարմին են ներկայացվելու 2019 թվականի ռադիոհաձախականության օգտագործման թույլտվության տրամադրման (թույլտվության գործողության ժամկետի երկարաձգման, փոփոխման, վերածնակերպման) և ռադիոհաձախականության օգտագործման պարտադիր վճարների չափերը,

- իրականացվելու է ռադիոհաձախականության օգտագործման թույլտվություն ունեցող անձանց 2018 թվականի ռադիոհաձախականության օգտագործման տարեկան և եռամսյակային վճարների հաշվարկ, ըստ անհրաժեշտության նաև վերահաշվարկ,

- ռադիոռելեային կապի և շարժական ռադիոկապի նոր կայանների տեղադրման, աշխարհագրական տարածքի փոփոխման, շահագործումից հանելու և այլ տեխնիկական տվյալների փոփոխման դեպքերում՝ ուսումնասիրությունների արդյունքների հիման վրա կատարվելու են համապատասխան փոփոխություններ թույլտվության պայմաններում,

- օրենսդրության պահանջներին համապատասխան ոլորտի իրավասու մարմնին պարբերաբար ներկայացվելու են Հանձնաժողովի կողմից տրամադրված՝ ռադիոհաձախականությունների օգտագործման թույլտվություններում

հեռուստառադիոհաղորդումների հեռարձակման (վերահեռարձակման) արտոնագրերի պայմաններով ամրագրված տեղեկություններ,

- սիրողական ռադիոյին վերաբերող իրավական դաշտի կանոնակարգման աշխատանքների արդյունքում՝ 2018 թվականին շարունակվելու են ներգրավել Լեռնային Ղարաբաղի Հանրապետությունում ռադիոսիրողական գործով զբաղվելու ցանկություն ունեցող քաղաքացիներին, կազմակերպել համապատասխան թույլտվությունների տրամադրման գործընթացը և աջակցել որակավորման չափանիշներին սիրողական ռադիոսպերատորների համապատասխանությունն ստուգելու որակավորման քննությունների կազմակերպման հարցերում:

Լիցենզավորում.

Հանձնաժողովի կարգավորման տիրույթում գտնվող ոլորտների լիցենզավորման կարգերի լրամշակումն ու կատարելագործումը մշտապես գտնվում են հանձնաժողովի ուշադրության կենտրոնում:

Հանձնաժողովը մշտապես հետևում և հետևելու է հանրային ծառայությունների ոլորտում կարգավորվող ընկերությունների կողմից լիցենզիաների պայմանների պահպանման և իրավական ակտերի պահանջների կատարման ընթացքին՝ ինչպես ընկերություններից պահանջվող հաշվետվությունների, այնպես և ընտրանքային կարգով տեղերում իրականացվող մոնիթորինգների միջոցով:

Հեռահաղորդակցության (էլեկտրոնային հաղորդակցության), հեռուստատեսության և ռադիոյի բնագավառներում լիցենզավորման քաղաքականության ուղղությամբ կիրականացվեն հետևյալ հիմնական միջոցառումներն ու աշխատանքները.

- շարունակվելու է ընդլայնվել էլեկտրոնային հաղորդակցության ծառայությունների հասանելիության աշխարհագրությունը և ապահովել մատչելիությունը, իրականացնել աշխատանքներ գործարար միջավայրի բարելավման և օրենսդրության պահանջների բավարարման դեպքում լիցենզավորել ցանցի կամ ծառայությունների մատուցման լիցենզիայի ստացման հայտեր ներկայացրած տնտեսավարողներին,

- համագործակցելով ոլորտի իրավասու մարմնի հետ՝ հայտնաբերել և օրինական դաշտ ներգրավել առանց ցանցի կամ ծառայությունների մատուցման լիցենզիայի էլեկտրոնային հաղորդակցության ծառայություններ մատուցող անձանց, կազմակերպել մոնիթորինգներ և ստուգումներ: Հայտարարել ռադիոհաղորդումների հեռարձակման (վերահեռարձակման) լիցենզավորման մրցույթներ մի շարք ազատ (չզբաղեցված) հաճախականություններով:

- իրականացվելու են էլեկտրոնային հաղորդակցության, հեռուստատեսության և ռադիոյի բնագավառների կարգավորվող ընկերությունների կողմից ներկայացվող ֆինանսական և տեխնիկատնտեսական հաշվետվությունների վերլուծությունները, ըստ այդմ կազմվելու ընկերությունների ֆինանսական և ծավալային ցուցանիշների վերաբերյալ համապատասխան ամփոփագրեր՝ որոնք թույլ են տալիս Հանձնաժողովին մշտապես հետևել կարգավորվող ընկերությունների կողմից լիցենզիաների պայմանների պահպանման և իրավական ակտերի պահանջների կատարման ընթացքին:

Սակագնային քաղաքականություն

Հանձնաժողովը 2018 թվականի ընթացքում ևս հետևողականություն կդրսևորի իրականացվող սակագնային քաղաքականության կատարելագործման աշխատանքներում:

Կարգավորվող ընկերությունների ֆինանսական և տեխնիկատնտեսական հաշվետվությունների վերլուծության արդյունքները հիմք են հանդիսանում կարգավորմանը վերաբերվող հիմնավորված որոշումների ընդունման, սակագնի սահմանման ու վերանայման, ներդրումային ծրագրերի իրականացման ընթացքի գնահատման և լիցենզիայի պայմանների վերահսկման համար, ինչպես նաև հնարավորություն են տալիս ձևավորել կարգավորվող ընկերությունների ֆինանսական և տեխնիկատնտեսական ցուցանիշների համապատասխան վիճակագրական բազա:

Հաշվի առնելով դրամի փոխարժեքի տատանումները և սղաճի փոփոխությունները յուրաքանչյուր տարի կճշգրտվեն էլեկտրական էներգիա արտադրող կայաններից առաքվող էլեկտրական էներգիայի(հզորության) վաճառքի սակագները:

Հեռահաղորդակցության (էլեկտրոնային հաղորդակցության), հեռուստատեսության և ռադիոյի և փոստային կապի բնագավառներում սակագնային քաղաքականությունը կծավալվի ոլորտի գերիշխող օպերատորի կողմից ներկայացված կամ Կարգավորողի նախաձեռնությամբ պահանջված հանրային էլեկտրոնային հաղորդակցության ծառայությունների կարգավորման ենթակա սակագների, ինչպես նաև փոստային կապի ունիվերսալ ծառայությունների սակագների սահմանման և վերանայման հայտերի ուսումնասիրության, վերլուծության և համապատասխան սակագների սահմանման շուրջ: Ծառայություններ մատուցողների կողմից գանձվող վճարները կարգավորելիս ուշադրության կենտրոնում կպահվի այն հանգամանքը, որ տվյալ ծառայություններ մատուցողները հնարավորություն ունենան արդյունավետ կառավարման հիման վրա ստանալու հանրությանը ծառայություններ մատուցելու գործում իրենց կատարած ներդրումների ողջամիտ արժեքի նկատմամբ եկամտաբերության ողջամիտ մակարդակ:

Ներդրումային ծրագրեր

Հաշվի առնելով, որ կարգավորվող ընկերությունների կատարած ներդրումների վերադարձի հետ կապված ծախսերը ներառվում են սպառողներին մատուցվող ծառայությունների սակագներում և հետևաբար անմիջական ազդեցություն ունեն սակագների վրա, հանձնաժողովը ներդրումների առավել արդյունավետ ուղղությունների բացահայտման նպատակով 2018 թվականի ընթացքում շարունակելու է էներգետիկայի բնագավառում կարգավորվող ընկերությունների կողմից իրականացվող ներդրումային ծրագրերի ուսումնասիրման և համաձայնեցման գործընթացը:

Ջանքեր են գործադրվում սպառողների հոսանքազրկումների քանակի և տևողության, թույլատրելի սահմաններից էլեկտրական էներգիայի լարման շեղման դեպքերի քանակի և տևողության ցուցանիշների հավաստիության մակարդակը բարձրացնելու ուղղությամբ: Դրանց մակարդակի ճշգրտումը հնարավորություն կտա առավել հասցեական և արդյունավետ իրականացնելու ներդրումները:

Էներգետիկայի բնագավառում փոքր ՀԷԿ-ի կառուցման խրախուսման ուղղությամբ հանձնաժողովի կողմից տարվող հստակ քաղաքականության արդյունքում յուրաքանչյուր տարի արձանագրվում են նոր դրական ցուցանիշներ, որոնք վկայում են բնագավառի զարգացման կայուն առաջընթացի մասին:

Հանձնաժողովը աշխատում է խրախուսել ընկերությունների այն բոլոր նախաձեռնությունները, որոնք կնպաստեն էլեկտրաէներգետիկայի, տեղեկատվական և էլեկտրոնային հաղորդակցության բնագավառներում նոր տեխնոլոգիաների ներդրմանը, լայնաշերտ (արագագործ) ինտերնետ հասանելիության ծառայությունների բարելավմանը:

II. Տնտեսական մրցակցության պաշտպանության բնագավառ

Տնտեսական մրցակցության պաշտպանության բնագավառում 2018 թվականի գործունեությունը, ինչպես և նախորդ տարիներին, ուղղված կլինի Լեռնային Ղարաբաղի Հանրապետությունում ազատ տնտեսական մրցակցության պաշտպանության և խրախուսման, բարեխիղճ մրցակցության համար անհրաժեշտ միջավայրի ձևավորման, ձեռնարկատիրության զարգացման և սպառողների շահերի պաշտպանության ոլորտներում առաջնահերթ խնդիրների լուծմանը:

Գերիշխող սուբյեկտների բացահայտում և գործունեության վերահսկողության ուղղությամբ աշխատանքներ կծավալվեն տնտեսության մրցակցային իրավիճակը, այդ թվում, ապրանքային շուկաներում կենտրոնացվածության աստիճանը, մասնակիցների քանակը, գերիշխող դիրքի առկայության ազդեցությունը գնահատելու և հետևելու նպատակով: Հանձնաժողովը իր գործունեության ընթացքում իրականացրել է 131 ուսումնասիրություն 67 ապրանքային շուկաներում: Ապրանքային շուկաներում իրականացրած ուսումնասիրությունների արդյունքում բացահայտվել և կարգավորման դաշտ է բերվել 5 մենաշնորհ և 49 գերիշխող դիրք ունեցող տնտեսավարող սուբյեկտներ: Այժմ հանձնաժողովի վերահսկողության ներքո 25 ապրանքային շուկայում գործում են 5 մենաշնորհ և 20 գերիշխող դիրք ունեցող սուբյեկտներ, ինչպես նաև 7 առևտրային ցանց՝ դեղերի, հացամթերքի և մանրածախ առևտրի ոլորտներում:

Կուսումնասիրվեն նոր ապրանքային շուկաներ և աշխատանքներ կտարվեն մրցակցային դինամիկան պարզելու և վերլուծելու նպատակով: Ապրանքային շուկաների ուսումնասիրությունը իրականացվում է նոր մոթոդաբանությամբ, որն ուղղված է ապրանքային շուկաներում տեղի ունեցող փոփոխությունները դիտարկել ոչ թե ստատիկ իրավիճակում այլ դինամիկ փոփոխությունների համատեքստում:

Ապրանքային շուկաներում գերիշխող դիրքի չարաշահումը՝ մասնավորապես չհիմնավորված գների կիրառումը բացառելու նպատակով Հանձնաժողովի կողմից կշարունակվեն իրականացվել շաբաթական դիտանցումները, ինչպես նաև վերլուծության կենթարկվեն նրանց գործունեության վերաբերյալ կիսամյակային տեղեկատվությունները: Կշարունակվեն նաև առաջին անհրաժեշտության և գերիշխող սուբյեկտների կողմից իրացվող ապրանքների շաբաթական մոնիթորինգները:

Նախատեսվում են միջոցառումներ ապրանքային շուկաներում իրացման կամ ձեռքբերման չհիմնավորված, խտրական գների սահմանման, կիրառման, կամ

օրենսդրությանը հակասող առևտրի այլ պայմանների ուղղակի կամ անուղղակի պարտադրման դեպքերի հայտնաբերման և ուսումնասիրության ուղղությամբ:

Քարեխիղճ մրցակցային միջավայրի ապահովում.

Անբարեխիղճ մրցակցության դրսևորումների հայտնաբերման, դրանց դադարեցման և հետագայում բացառելու ուղղությամբ Հանձնաժողովի կողմից շաբաթական կտրվածքով մանրածախ առևտրի ոլորտում իրականացվող դիտանցումների ընթացքում ուսումնասիրվում են ապրանքների վրա մատնանշվող տեղեկությունների արժանահավատությունը, օրենսդրության պահանջների համապատասխանությունը, ինչպես նաև հնարավոր մոլորեցման հետ կապված խնդիրները:

Անբարեխիղճ մրցակցության դրսևորումների բացահայտման և դադարեցման նպատակով 2018 թվականին կշարունակվեն իրականացվել շաբաթական դիտանցումներ, քաղաքացիների և տնտեսվարող սուբյեկտների դիմումների, ՋԼՄ–ների հրապարակումների հիման վրա ուսումնասիրություններ:

Նախատեսվում է նաև ուշադրության կենտրոնում պահել մրցակցային միջավայրի արդի հիմնախնդիրները՝ հակամրցակցային համաձայնությունները և պետական օժանդակությունը:

III. Հանձնաժողովի գործունեության հրապարակայնության, թափանցիկության ապահովումը և համագործակցությունը

ԼԴՀ հանրային ծառայությունները և տնտեսական մրցակցությունը կարգավորող պետական հանձնաժողովը իր գործունեությունը ծավալում է թափանցիկ և հրապարակային՝ ապահովելով հասարակության հետ արդյունավետ կապերի ամրապնդումը: Վերջինս հնարավոր է դառնում.

- զանգվածային լրատվության միջոցների, պետական կառույցների, գործարար հանրության, սպառողների և հասարակական կազմակերպությունների հետ համագործակցության,
- Հայաստանի Հանրապետության գործընկեր Հանձնաժողովների և նրանց միջոցով նաև միջազգային կառույցների հետ համագործակցության շնորհիվ:

2018 թվականին հավատարիմ մնալով իր թափանցիկ և հրապարակային գործելավոճին Հանձնաժողովը ձգտելու է առավելագույնս նպաստել հանրության բոլոր շերտերի իրազեկվածության մակարդակի բարձրացմանը: Սահմանված կարգով թարմացվելու և համալրվելու է Հանձնաժողովի պաշտոնական կայք էջը: Լուսաբանվելու են համապատասխան բնագավառներում կատարված աշխատանքները, նախատեսվող ծրագրերը, տեղեկատվական նյութերն ու տեղեկանքները: Օպերատիվ արձագանքելու է «Թեժ գծի» միջոցով սպառողներից ստացված ահազանգերին, դիմում-բողոքներին, զանգվածային լրատվության միջոցների հրապարակումներին:

Ըստ անհրաժեշտության կազմակերպվելու են հարցազրույցներ, ճեպագրույցներ, քննարկումներ:

Համագործակցություն. Հանձնաժողովը ծրագրային տարում շարունակելու է ակտիվ հանագործակցությունը Հայաստանի հանրապետության հանրային ծառայությունները կարգավորող հանձնաժողովի, տնտեսական մրցակցության պաշտպանության պետական հանձնաժողովի և հեռուստատեսության և ռադիոյի ազգային հանձնաժողովի հետ: Արդյունավետ համագործակցության շրջանակներում շարունակվելու են խորացնել ոլորտային շփումները՝ ըստ կնքված համագործակցության համաձայնագրերի:

Շարունակական բնույթ են կրելու կարգավորման ոլորտի կատարելագործմանը նպատակաուղղված ուսուցողական և վերապատրաստման դասընթացները, սեմինար պարապմունքները, փորձի փոխանակման նպատակով կազմակերպվող փոխադարձ այցելությունները, համատեղ ուսումնասիրությունները, նիստերը: ՀՀ գործընկեր հանձնաժողովները կշարունակեն հնարավորություն ընձեռել ԱՀ Հանձնաժողովին մասնակիցը դառնալ միջազգային համագործակցության:

ՀՀ ՀԾԿՀ հետ համագործակցությունը նպաստելու է առաջատար երկրների փորձին ծանոթանալուն՝ տեղում կիրառելու նպատակով, հնարավորություն կընձեռի մասնակցել վերապատրաստման դասընթացներին և սեմինար պարապմունքներին, ինչպես նաև գործուն մասնակցություն ունենալ նորմատիվ ակտերի մշակման ու քննարկման աշխատանքներին:

ՀՀ ՏՄՊՀ հետ համագործակցությունը կնպաստի մրցակցության համար բարենպաստ միջավայր ապահովելուն և մրցակցության քաղաքականության կիրարկման արդյունավետության բարձրացմանը:

ՀՀ ՀՈԱՀ հետ համագործակցության շրջանակներում կընդլայնվի ՀՀ և ԼՂՀ հեռուստառադիոընկերությունների միջև արդեն ստեղծված համագործակցության դաշտը:

Հանձնաժողովը կհամագործակցի նաև պետական այլ մարմինների, կազմակերպությունների, պաշտոնատար անձանց հետ, իր լիազորությունների իրականացման համար անհրաժեշտ տեղեկատվություն ստանալու, փոխգործակցության և փոխօգնության ամրապնդման նպատակով:

IV. Հանձնաժողովի բյուջետային մուտքերի ապահովումը և պահպանման ծախսերի նախահաշիվը

2018 թվականին հանձնաժողովի վերահսկողության ներքո կգտնվի կարգավորող ընկերությունների կողմից Լեռնային Ղարաբաղի Հանրապետության պետական բյուջե մուտքերի ապահովման գործընթացը՝ պետական տուրքերը, ռադիոհաճախականությունների տրամադրման և օգտագործման պարտադիր վճարները, կարգավորման պարտադիր վճարները: Ըստ կանխատեսումների՝ 2018 թվականին նշված աղբյուրներից պետական բյուջե կփոխանցվի շուրջ 970 278,9 հազ. դրամ (կից աղյուսակ):

Հանձնաժողովի պահպանման և գործունեության համար անհրաժեշտ ֆինանսավորումն իրականացվում է Լեռնային Ղարաբաղի Հանրապետության պետական բյուջեից՝ կարգավորման պարտադիր վճարների միջոցների հաշվին: Հանձնաժողովի և աշխատակազմի առաջիկա տարվա բյուջետային ֆինանսավորման հայտը (նախահաշիվը) օրենքով սահմանված ժամկետում ներկայացվելու է ԼՂՀ կառավարության լիազորած մարմնին և 2018 թվականին այն կազմելու է 172 140,3 հազ. դրամ:

Ամփոփելով կատարման ենթակա աշխատանքների սույն ծրագիրը և մշտապես ունենալով Լեռնային Ղարաբաղի Հանրապետության Ազգային ժողովի և Լեռնային Ղարաբաղի Հանրապետության կառավարության աջակցությունը՝ Հանձնաժողովն ակնկալում է համակողմանի աջակցություն տարբեր կառույցների ու հասարակության կողմից և բաց է Հանձնաժողովի գործունեությանը վերաբերող խնդիրների քննարկման համար:

ԱՂՅՈՒՍԱԿ

2018 թվականի կանխատեսվող բյուջետային մուտքերի

| Եկամտատեսակը | Գումարը (հազար ՀՀ դրամ) |
|--|----------------------------|
| Ռադիոհաճախականությունների օգտագործման վճարներ | 768523,2 |
| Պետական տուրքեր | 24175,0 |
| Հանրային ծառայությունների կարգավորման պարտադիր վճարներ | 177580,7 |
| Ընդամենը | 970278,9 |